

DIDZA' GUSÖL-LĒ'Ē PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

1 ¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxí' lu në'ë Dios isól-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. ³ Bulu'zúajë' lu guichi yúgu'të le ral-la' gunë' Zxí'inë' Dios, Nu na' naca Xanru' Jesucristo. Lu yöl-la' bönachi queë' náquië' zxí'ini xi'sóë' David, ⁴ pero ca naca bö' naca cazë', le naca lá'ayi, naca bë' náquië' Zxí'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. ⁵ Ni'a que le benë' Jesucristo ruzí'iru' xibé le ruzá' ládxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzölió Lë', en ilún ca rnna xtídzë'ë. ⁶ Bítsa'li' libí'ili' ládjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxí'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queéli' le ruzá' ládxë'ë queëru', en le ribequi dxi ládxi'ru'.

Ré'ënë' Pablo tsöjyúë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queéli' yúgu'tëli', ate' ta'guixjö' bönachi idútë yödzölió ca réajlë'ëli' Jesucristo. ⁹ Idú ládxa'a runa' xichinë' Dios, runa' libán que didza' dxi'a ca naca queë' Zxí'inë'. Nózinë' Dios rulídzatica'sa'-në', en rinábida'-në' gaca tsahui' queéli'.

¹⁰ Rinábitica'sida' Dios, channö naca le ré'ënë' Lë', gunnë' neda' lataj uduyúa' libí'ili'. ¹¹ Caní rinábida'-në' tu' raca ládxa'a ilé'eda' libí'ili' para gaca guna' ga gata' queéli' tu le unödzjë' Dios Bö' Lá'ayi queéli', le gun ga gácali' tsutsu. ¹² Lë na' ré'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', ré'ënda' inózili' lë ni. Zián luzuí bë' ládxa'a guída' ga zóali', pero ga ridxintë na'a biti' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönachi yödzölió ni. ¹⁴ Dë le ral-la' guna' quégaca yúgu'të bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni'i, en quégaca bönachi cabí ta'yéajni'i. ¹⁵ Que

lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

¹⁶ Biti' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, ré'ënë' Dios ila'yönnë' bönni' judío le, ate' tödi na' ila'yöni ca' bönachi izá'a. ¹⁷ Didza' dxi'a ni rulu'i rë'u gunë' Dios ga huöácaru' tsahui', channö uyéajlë'ëru' Lë', en biti' gaca chopa ládxi'ru'. Ca naca lë ni nazúaj ca' lu guichi lá'ayi, rñna: "Nu naca tsahui' tu' réajlë' Dios, gata' yöl-la' na'bán que nu na'."

Xíguia' nabága'gaca bönachi

¹⁸ Dios, Nu zoa yehua' yubá, bulu'e lahui biti' rilé'enë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' biti' naca tsahui' quégaquië' ta'dá'baguë'ë le naca idútë li. ¹⁹ Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' buluí'i quézinë' Dios lë ni ga na' nacu'ë. ²⁰ Dza ni'te cate' si' guta' yödzölió, ga ridxintë na'a dza, yugu' le nunë' Dios nácgaca bë' le cabí gaca ilé'ëru' queë' Dios, ca naca yöl-la' huáca idú queë', en le naca cazë' Dios. Que lë ni na', biti' gaca ila'nnë' biti' nabága'gaquië' xíguia'. ²¹ Cate' ni' gulúnbë'ë Dios, biti' gula'yéaj ládxi'gaquië' Lë' ca ral-la' tseaj ládxi'ru'-në' Dios, en biti' gulé' Lë': "Xclenu'." Que lë ni na', cá'asö böáca le gula'zá' ládxi'gaquië', ate' gula'chul-la gula'nítië' tu' nazidi icja ládxi'do'gaquië'. ²² Sal-la' guléquinë' ta'yéajni'inë' yenni', bulu'huöáquië' bönni' biti' bi nózguequinë' ²³ tu' bulu'cá'anë' yöl-la' bení' queë' Dios Nu zóatica'sö, ate' gula'yéaj ládxi'gaquië' budó' guiój budó' yaga, budó' na' nácgaca ca yugu' bönni' tati cazë', en ca yugu' böa'do' zoa xíligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lé'ëba' lu yu ni.

²⁴ Que lë ni na' Dios guléaj ládxi'ë légaquië' para ilunë' yugu' le ta'zé ládxi'gaquië' le ruá' dö', ate' caní guca, bulu'cá'ana cúngaquië' lu yöl-la' stu' tuë' len ia'tué'. ²⁵ Guca caní tu' bulu'cá'anë' xtídzë'ë Dios, le naca idútë li, ate' gula'zí' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

²⁶ Que lë ni na' Dios guléaj ládxi'ë légaquië' para ilunë' yugu' le ta'zé ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. ²⁷ Lësca' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zé ládxi'gaquië' le ruá' dö' túnlenë' tuë' ia'tué', en gulunë' le tun ga nu rutuí'i, tu' gula'cuá'lenë' la' luzá'a bónni'gacasë'. Que lë ni na' gula'guí'i

gula'záquië' lu xipéla'gaquië' yugu' bönni' gulunë' caní tu' bubi'ë Dios
quégaquië' ca sa'yéaj dul-la' na' gulunë' tu' nucá'anagaquië' Dios.

²⁸ Tu' cabí gulé'ënnë' ilunë' Dios bal, que lë ni na' guléaj ládxë'ë Dios
légaquië' para ila'zá' ládxi'gaquië' le biti' naca dxi'a, en ilunë' le cabí
nazaca'.

²⁹ Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídi'në'.

Biti' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zí' yé'enë' bönachi, en zi'të nácagaquië' xihui'.

Ta'nnë' que luzá'agaquië'.

³⁰ Ta'nnë' le cabí nácatë que luzá'agaquië'.

Biti' ta'lé'enë' Dios dxi'a, en nácagaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'guiljë' le ruá' dö' ilunë', en ta'dá'baguë'ë xuz xiná'agaquië'.

³¹ Nácagaquië' bönni' biti' ta'yéajni'inë', en tun díjtjagaquië'
xtídza'gaquië'.

Biti' nácagaquië' dxi'i ladxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

³² Nózguequi quézinë' le nuzóë' tsaz Dios ca ral-la' gaca quégaca nupa
tun yugu' le caní, ilátigaca tsaz. Sal-la' nóziguequinë' lë ni, calégasö
caní tunë', pero ta'yaza ládxi'gaquië' nupa tun ca' caní.

Naca tsahui' ichúguië' Dios quégaca bönachi gátigaca

2 ¹ Que lë ni na', biti' gaca ubéaj tsahui' cuinu', núti'tës nu nacu',
richugu bë'u luzó'o. Cate' richugu bë'u luzó'o, rusubaga' cuinu'
xíguia', tu' richugu bë'u luzó'o, en lësca' runu' li'. ² Nöz quéziru' ca
ruchi'a rusöröë' Dios. Naca idútë li ca ruchi'a rusöröë' nupa tun le ruá'
dö'. ³ Li' richugu bë'u nupa tun le ruá' dö', en tuz ca runu' li'. ¿Naru'
réquitsenu' uló' li' cate' uchi'a usöröë' Dios? ⁴ ¿Naru' rucá'anatso' cá'asö
yöl-la' dxi'i ladxi' idú queë' Dios, en yöl-la' riböza zxön ladxi' queë', en
ca runë', ridzenë' para lenë' li'? ¿Naru' cabí nöz quézinu' ruzá' ládxë'ë
Dios quiu' yöl-la' dxi'i ladxi' queë' para gunë' ga ubí'i ládxu'u? ⁵ Lu yöl-
la' ládxi'do' zidi quiu' biti' rubí'i ládxu'u. Que lë ni na' rusubaga' cuinu'
xíguia' gunë' Dios li' cate' uchi'a usöröë' bönachi, ate' gaca bë' naca ca
ral-la' gunë' Dios cate' ichúguië' quégaca bönachi ilátigaca. ⁶ La' dza
ní'isö ubí'i cazë' Dios que queë' bönni' tsca naca le gulunë' tu tuë'.
⁷ Unödzjë' yöl-la' na'bán idú quégaca nupa túntica'sö le naca dxi'a, tu'
tuí'i ládxi'gaquië' ulu'zi'ë xibé' Dios, en ulu'rúajë' dxi'a lahuë' Lë', en
ila'cuá'tica'së'. ⁸ Lu yöl-la' rilé queë', Dios gunë' xíguia' nupa
ta'dá'baga', en biti' té'ëni ilún ca rnna le naca idútë li, pero tun ca rnna
le cabí naca tsahui'. ⁹ Ila'guí'i ila'záquië', en huí'inida' ládxë'ë yúgu'të

bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. ¹⁰ Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹¹ Caní uchi'a usöröë' Dios bönachi, ate' Lë' biti' runë' bal le ta'nnasö bönachi. ¹² Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. ¹³ Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'. ¹⁴ Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. ¹⁵ Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'túë'. ¹⁶ Caní ubi'ë Dios quégaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

¹⁷ Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios, ¹⁸ nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácaterö dxi'a. ¹⁹ Réquili' gaca ulu'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. ²⁰ Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. ²¹ Na'a, libí'ili' rusédili' ia'zíca'rö bönachi. ¿Naru' cabí ralla' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? ²² Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guió'j budó' yaga. ¿Naru' ribántsali' le dzö'ö lu yudo' quéguequi? ²³ Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en rigúitsjali' xibá le gunná bë'ë Lë'? ²⁴ Nazúaj lu guichi lá'ayi ca runli', rnna: Ni'a que le runli' libí'ili' nupa biti' nácagaca judío ta'nné zi' queë' Dios.

²⁵ Le nácaté ruzi'u xibé lë na' narugu lu xipélu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios,

pero channö riguitsju' xibá le gunná bè'è Lè', nuhuöácu' ca tu bönni' biti' néquinè' queè' Dios. ²⁶ Que lè ni na', channö zoè' tu bönni' biti' narugu lu xipélè'è lè na' naca bè' nu nazí'i xibá queè' Dios, pero runè' idútè ca rinná bè' xibá queè' Lè', bönni' ni náquiè' lahuè' Dios ca tu bönni' narugu caz lu xipélè'è lè na' naca bè' sal-la' biti' narugu lu xipèla' cazè'. ²⁷ Bönni' na' biti' narugu lu xipélè'è lè na' naca bè' nu nazí'i xibá queè' Dios, pero runè' idú ca rinná bè' xibá na' queè' Dios, ca runè' bönni' ni ruluí'i nabága'li' libí'ili' xíguia', sal-la' dè lu ná'ali' xibá na' queè' Dios, en narugu lu xipèla'li' lè na' naca bè' nazí' lu ná'ali' xibá na' queè' Dios, pero biti' runli' ca rinná bè' xibá queè' na'. ²⁸ Biti' náquiè' idú bönni' judío tu bönni' nácasè' caní lu yöl-la' bönáchisö queè', ate' biti' naca idú lè na' naca bè' le narúgusö lu xipélè'è nu bönni'. ²⁹ Náquiè' idú bönni' judío bönni' na' náquiè' caní lu icja ládxi'da'ahuè', en le naca idú le narugu lu xipélè'è nu bönni' le naca bè' nu nazí'i xibá queè' Dios, naca tu le yu'u icja ládxi'do'gaca bönachi. Naca que bö' naca cázaru', en calèga que yöl-la' bönáchisö queéru'. Nu bönni' náquiè' caní, biti' tun bönachi lè' bal, pero Dios caz gunè' lè' bal.

3 ¹ Channö caní naca, ¿bizxi ruzi'tsè' xibé tu bönni' tu' náquiè' judío? ¿Bizxi ruzi'è xibé tu bönni' judío tu' narugu lu xipélè'è? ² Yenni' ruzi'è xibé, en zían ca ruzi'è xibé. Le nácatèrö lo, Dios gulu'è lu ná'agaquiè' yugu' bönni' judío didza' lá'ayi queè'. ³ Bal-lè' biti' ta'yéajlè'è Dios. ¿Naru' réquitsenu' biti' gunè' Dios ca rnna xtídzè'è tu' cabí ta'yéajlè'è Lè'? ⁴ ¡Biti' ca' gaca! Ral-la' guéquibe'eru' rúntica'sè' Dios ca rnna didza' bè'è, sal-la' ta'z'í' yè' yúgu'tè bönachi. Ca naca queè' nazúaj lu guichi lá'ayi le rnna:

Gaca bè' nacu' tsahui' ni'a que didza' ru'u,
en uruju' tsahui' channö nu uchi'a usöró Li'.

⁵ Cate' runru' le ruá' dö', Dios rnnè' biti' naca tsahui' le runru'. Lè ni naca bè' tsahui' náquiè' Dios. Nacuá' nupa ta'nná: “Le cabí naca tsahui' le runru' naca bè' náquiè' Dios tsahui', ate' que lè ni na' biti' ral-la' gunè' rè'u xíguia'.” ⁶ ¡Biti' ca' naca caní! La'tu' ruzi'è xibé Dios le ruá' dö' runru', ¿nacxi caz gaca uchi'a usöróè' bönachi yödzölió ni?

⁷ Cate' nu rizí' yè', Dios rnnè' biti' ruí'i didza' nu na' ca runè' Lè'. Lè ni naca bè' naca idútè li didza' ru'è Dios. Ta'nné' bönni' le ta'z'í' yè'è légaquiè' run ga gaca queè' Dios yöl-la' ba, ate' biti' ral-la' ichúguiè' quégaquiè', cabí inné' nácagaquiè' bönni' dul-la'. ⁸ ¿Naru' huannátsaru': “Guá'aru' dö' para gaca le naca dxi'a”? Nupa na' ta'nné' zi' queéru' ta'nná rusédiru' caní, ate' tsahui' naca ichúguiè' Dios quéguequi.

Yúgu'tèru' nabága'ru' dul-la'

⁹ ¿Bizxi caz innaru' na'a? Ca naca queétu' netu', bönni' judío, ¿nácarrötu' tsahui' ca ia'z'íca'rö bönachi? ¡Biti' ca' nácatu'! Chibulu'a ni,

nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'tè' nabága'gaquiè' dul-la'! ¹⁰ Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

¹¹ Cuntu nu réajni'i.

Cuntu nu riguilaj Dios.

¹² Yúgu'tè' ta'dé' ga yúbölö.

Yúgu'tè' nanítigaquiè'.

Cuntu nu run le naca dxi'a, cuntu nu caz.

¹³ Lubá'agaquiè' nácagaca ca yeru ba nayáljagaca.

Len yöl-la' rinnësö quégaquiè' ta'zí' yé'enè' luzá'agaquiè'.

Didza' rirúaj ruá'agaquiè' naca ca le yudzu láya'ba' bëla sínia'.

¹⁴ Len yugu' didza' tu'è, tu'didza' yúdxinè' bönachi, en ta'nné' zi'è quégaca bönachi na'.

¹⁵ Nacu'è sina' tútigaquiè' bönachi.

¹⁶ Gáti'tës ga ta'dödè' tu'sunítiè', en tu'saca' zi'è luzá'agaquiè'.

¹⁷ Biti' ta'zéqui'nè' ila'bözè' dxí'ado'.

¹⁸ Biti' ca' tádxinè' Dios.

¹⁹ Nóziru' yúgu'tè' didza' ni bè'è Dios, rè' yugu' bönni' na' dè lu ná'agaquiè' xibá queè'. Que lè ni na' cuntu nu gaca inná bitì' nabaga' dul-la', ate' yúgu'tè' bönachi idútè yödzülió, uchi'a usöröè' Dios quéguequi. ²⁰ Tuí'i ládxi'gaquiè' yugu' bönni' judío ilunè' yugu' le rinná bë' xibá queè' Dios para ulu'huóáquiè' tsahui', pero cuntu nu huóaca tsahui' caní, tu' nuzóè' Dios xibá queè' para guéquibe'eru' nabága'ru' dul-la'.

Uláru' tu' réajlè'èru' Jesucristo

²¹ Na'a, chibuluí'i lahui ca gaca huóácaru' tsahui' lahuè' Dios. Biti' gaca huóácaru' tsahui' tu' runru' ca rinná bë' xibá queè' Dios, sal-la' lu xibá queè' na', en lu guichi lá'ayi ga nazúajgaca le gula'nné' bönni' gulu'è didza' uláz queè' Dios, ruí'i didza' ca gaca huóácaru' tsahui'.

²² Dios caz runè' ga huóácaru' tsahui' tu' réajlè'èru' Jesucristo, ate' gunè' ga ulu'huóaca tsahui' yúgu'tè' nupa ila'yéajlè' Lè'. Tuz ca nácagaca yúgu'tè' bönachi ²³ tu' núngaquiè' yúgu'tè' dul-la', en bitì' ca' nácagaquiè' tsahui' ca na' náquiè' Dios idú tsahui'. ²⁴ Dios ruzá' ládxi'è queè'ru', en nunsè' rè'u tsahui' tu' böá'uè' Jesucristo rè'u. ²⁵ Dios budödè' Jesucristo uláz queè'ru'. Lè' bulaljè' xichönè', le rigúa dul-la', lè na' uzí'iru' xibé channö uyéajlè'èru' Lè'. Caní benè' Dios para gaca bë' náquiè' tsahui' Lè' sal-la' lu yöl-la' riböza zxön ladxi' queè' budódisè' cá'asö yugu' dul-la' benru' dza ni'te. ²⁶ Caní benè' Dios, buluí'i cuinë' tsahui' dza ni zóaru' na'a, ate' rugá'anè' tsahui' sal-la' rugúè' dul-la' nabága'gaca bönachi, runè' ga tu'huóaca tsahui' nupa ta'yéajlè' Cristo.

²⁷ ¿Naru' huácatsö gun ba zxön cuinru' ca naca queè'ru'? ¡Biti' ca' gácaru'! ¿Bizx que na'? Naca tu' nuláru', calèga tu' runru' ca rinná bë'

xibá queë' Dios, pero tu' réajlë'ësiru' Jesucristo. ²⁸ Na'a, rusáca'ru' queë'ru' nuhuóáquië' tsahui' tu' bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

²⁹ Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Öñ, náquië' ca' Dios quégaca bönachi izá'a na' ³⁰ tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipéla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipéla'gaquië' lë na' naca bë'. ³¹ Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¡Biti' ca' naca ca', pero nagá'anarö tsutsu xibá queë' na'!

Le benë' Abraham rusedi rë'u

4 ¹ ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? ² La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios. ³ Ca naca lë' ni nazúaj lu guichi lá'ayi, le rnna: “Abraham guyéajlë'ë Dios, ate' que lë' ni na' Dios benë' ga böáquië' tsahui' lahuë' Lë'.” ⁴ Channö zoa nu bönni' runë' xichinru', le riguízxjaru'-në' biti' naca tu le ruzá' ládxi'ru' queë', pero naca tu le ral-la'ru' queë' bönni' na'. ⁵ Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóáca tsahui' bönachi biti' nácacagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. ⁶ Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'. ⁷ Caní gunné' David:

¡Bica' ba bönni' na' Dios runiti lahuë' le biti' naca tsahui' nunë',
en rugüë' yugu' dul-la' nabáguë'ë!

⁸ ¡Bica' ba bönni' na', Dios biti' rusubáguë'ë lë' xíguia' tu' nözi dul-la' benë' bönni' na'!

⁹ ¿Naru' nácacacsë' bica' ba bönni' narugu lu xipéla'gaquië' lë na' naca bë', o nácacagaca ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. ¹⁰ ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zí'alö? Biti' guca cate' chinarugu lu xipélë'ë, pero zí'alö guca. ¹¹ Abraham guyéajlë'ë Dios cate' ni' biti' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le ruluí'isö chinuhuóáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipéla'gaquië' lë na' naca bë'. Tu' ta'yéajlë'ë Dios, huáca innë' Dios nácacagacië' tsahui' lahuë' Lë'. ¹² Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö

náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.

Le guzxí' lu në'ë Dios gata' queëru' tu' réajlë'ëru' Lë'

¹³ Guzxí' lu në'ë Dios bi unödzejë' queë' Abraham, en quégaca zxí'ini xi'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuöácagaquië' tsahui' lahuë' Lë' tu' ta'yéajlë'ë Lë'. ¹⁴ La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu në'ë Dios. ¹⁵ Ruluí'i xibá queë' Dios rë'u nabága'ru' xíguia', le run ga ichúguië' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

¹⁶ Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu le ruzá' ládxë'ë queëru'. Caní naca, para gaca bë'da' gata' quéguequi yúgu'të zxí'ini xi'sóë' Abraham lë na' guzxí' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. ¹⁷ Caní náquië' ca na' nazúaj lu guichi lá'ayi, le rnna: “Nuzóa' li' ca xúzgaca bönachi idútë yödzölió.”

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsca chizóa caz nu na' biti' zuíni.

¹⁸ Caní naca tu' gudxë' Dios Abraham na': “Ziántërö ila'cuá' zxí'ini xi'sú'.” Abraham guyéajlë'ë Dios, en benë' löza lë na' guzxí' lu në'ë Dios, sal-la' biti' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió. ¹⁹ Biti' guca Abraham chopá ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúladë'ë, enca' ca naca queënu Sara queë', nácanu nigula huödx. ²⁰ Biti' guca chopá ládxë'ë, en biti' gúquië' tu' caréajlë' ca naca le guzxí' lu në'ë Dios gunë' queë', pero bidipa ládxë'ë tu' guyéajlë'ë Dios, ate' gulu'ë Dios yöl-la' ba. ²¹ Idú ládxë'ë benë' löza Dios, napë' yöl-la' huáca gunë' idútë lë na' guzxí' lu në'ë. ²² Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

²³ Nazúaj lu guichi lá'ayi le rnna: “Dios buzóë' queë' náquië' tsahui'.” Nazúaj lu guichi caní, calégasö para uzi'ë xibé Abraham, ²⁴ pero para uzí'iru' xibé ca' rë'u. Rë'u ni, Dios gunë' ga huöácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. ²⁵ Jesús na', Dios budödë' Lë' para gútië' tu' nözi dul-la' nabága'ru', ate'

busubanë' Lë' lu yöl-la' guti, para gaca gunë' ga huöácaru' tsahui' lahuë' Lë'.

Le rata' queëru' tu' rnnë' Dios nuhuöácaru' tsahui'

5 ¹ Na'a, rnnë' Dios nuhuöácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuöácaru' tuz len Lë'. ² Tu' réajlë'ëru' Jesucristo, ruzí'iru' xibé le ruzá' ládxë'ë Dios queëru', le rutipa ládxi'ru'. Rudzéjaru' tu' runru' löza uzí'iru' ca' xibé yöl-la' zxön queë' Dios. ³ Calégasö caní rudzéjaru', pero rudzéjaru' ca' cate' riguí'i rizáca'ru', tu' chinóziru' le riguí'i rizáca'ru' rusedi rë'u cózaru' zxön ladxi'. ⁴ Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. ⁵ Cate' runru' löza Lë', biti' ca' raca chopá ládxi'ru'. Caní naca, tu' nuhuóla' nudzé'e icja ládxi'do'oru' yöl-la' nadxí'i queë' Dios rë'u. Runë' Dios Bö' Lá'ayi, Bönni' gusól-lë'ë Dios queëru' ga raca caní. ⁶ Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'. ⁷ Cuntu nu gué'ëni gati uláz queë' tu bönni' tsahui'. Nadxi ca' nu urugui gati uláz queë' tu bönni' náquië' idú dxi'a. ⁸ Dios ruluí'inë' rë'u ca nadxí'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'. ⁹ Chinuhuöácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca. ¹⁰ Cate' ni' biti' rilé'ëru'-në' Dios dxi'a, gútië' Zxí'inë' Dios uláz queëru' para huöácaru' tuz len Lë'. Na'a, tu' zoë' nabanë', en chinuhuöácaru' tuz len Lë', chinácada' löza uláru'. ¹¹ Rudzéjaru' lahuë' Dios ni'a que le benë' Xanru' Jesucristo, tu' nuhuöácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'. ¹³ Zí'atëlö ga bidxintë xibá queë' Dios, gulún bönachi yödzölió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégaquië'. ¹⁴ Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxí'ini xi'söë'. Lë ni ruluí'i rë'u ca ilaca tuz len Cristo yúgu'të nupa ila'yéajlë' Lë'.

¹⁵ Le rúnnasë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atërö naca le ruzá' ládxë'ë queëru' Dios, en le rúnnasë' queëru'. Ruzá' ládxë'ë queëru' lë ni ni'a que le benë' yetuzë' Bönni',

Jesucristo. ¹⁶ Le rúnnasë' Dios queéru' biti' naca ca le guca queéru' tu' nözi dul-la' na' benë' tuzë' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnnasë' Dios queéru' naca para huóácaru' tsahui' lahuë' Lë' sal-la' nabága'ru' dul-la' zían. ¹⁷ Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queéru' Dios ni'a que le benë' yetuzë' Bönni', Jesucristo.

¹⁸ Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'. ¹⁹ Bulu'huóáca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rnna xtídzë'ë Dios.

²⁰ Guyú'u xibá queë' Dios yödzölió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntërö naca le buzá' ládxë'ë Dios quégaca bönachi. ²¹ Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queéru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queéru' ni'a que le benë' Xanru' Jesucristo.

Naca tsca chinátiru' para cabirö gunru' dul-la' tu' nabániru'-në' Jesucristo

6 ¹ ¿Bizxi caz innaru' na'a? ¿Naru' gúntsaru' dul-la' para gáta'rö queéru' le ruzá' ládxë'ë Dios queéru'? ² ¡Biti' gun cázaru' ca'! Naca queéru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? ³ ¿Naru' cabí nózili' ca na' naca queéru'? Channö bidílaru' nisa para huóácaru' tuz len Cristo, lë na' bidílaru' nisa ruluí'i rë'u chigudódiru' lu yöl-la' guti tsözxón len Lë'. ⁴ Ca na' guca, gútilenru'-në' Cristo tsözxón, lësca' caní bigáchi'lenru'-në' tsözxón niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxón queë', lës caní ca' rë'u nubánlenru'-në' Jesús tsözxón para gácaru' bönachi idútë cubi queë'.

⁵ Channö nunru' Cristo tsözxón, gútiru' ca na' gútië' Lë', lësca' caní gunru'-në' tsözxón, ubanru' lu yöl-la' guti ca na' bubanë' Lë'. ⁶ Chinóz quéziru' lë ni, yöl-la' bönachi queéru' le guzóa zí'alö gudá'len Lë' tsözxón lë'e yaga cruz, para initi yöl-la' bönachi queéru' na' bénlenru' le dul-la', para cabirö inná be'e le naca dul-la' rë'u. ⁷ Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'. ⁸ Na'a, channö nátilenru'-në' Cristo tsözxón, réajlë'ëru' ubánlenru'-në' ca' tsözxón, ⁹ tu' chinóziru' bubanë' Cristo lu yöl-la' guti, en bíti'rö gátië'. Que lë ni na' bíti'rö bi gaca gun yöl-la' guti na' queë' Lë'. ¹⁰ Ca na' guca,

gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. ¹¹ Lësca' caní ral-la' usáca'li' queéli' naca queéli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

¹² Que lë ni na', biti' güí'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizé ládxli'li' le ruá' dö', lu le naca cázali'. ¹³ Biti' udödi cuinli' lu dul-la', biti' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a. ¹⁴ Biti' güí'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxë'ë queéru'.

Le rucudzu' didza' ca naca que nu bönni' nadó'o

¹⁵ ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxë'ë Dios rë'u? ¡Biti' ca' gunru' caní! ¹⁶ Chinóz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huóacali' tsahui'. ¹⁷ Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxli'li' runli' ca rinná bë' xibá na' budödi cuinli' lu në'e. ¹⁸ Tu' chinulali' lu na' dul-la', nuhuóacali' ca yugu' bönni' nadó'ogaca lu na' le naca dxi'a. ¹⁹ (Ruí'ilena' libí'ili' didza' ca tuí'i didza' bönachi, tu' cabí réajni'ili' idútë lu yöl-la' bönachi queéli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu né'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'. ²¹ Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutuí'ili', en run ga nu gati tsaz. ²² Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queéli' yöl-la' na'bán idú. ²³ Lazxaj nu run dul-la' naca yöl-la' guti, pero le rúnnasë' Dios queéru' naca yöl-la' na'bán idú, le rata' queéru' tu' nácaru' tuz len Xanru' Jesucristo.

Le rucudzu' didza' yöl-la' nutsaga na'

7 ¹ Bócha'ado', núlöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. ² Naca queé'li' ca naca que tu nigula nutsaga ná'lennu-në' bönni', yú'unu lu në'ë bönni' queé'nu tsanni ni zoë' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'. ³ Caní naca, tsanni ni zoë' nabanë' bönni' queé'nu, channö utsaga ná'lennu-në' ia'túë' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queé'nu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní raca queé'li', bócha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxë'ë Dios. ⁵ Tsanni ni' guyú'uru' lu na' yöl-la' bönáchisö queé'ru', le rinná bë' xibá na' ben ga gulaca bë' le guzé ládxi'ru' le ruá' dö', le gulún dxin lu idútë le naca cázaru' para ilún ga gátiru'. ⁶ Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queé'ru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¡Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxu'u le dë que luzó'o", biti' gunözda' naca dul-la' yöl-la' rizé ladxi' le dë que luzá'a. ⁸ Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládxa'a yúgu'të le ruá' dö'. Ga biti' ridxini xibá na', biti' naca bë' le naca dul-la'. ⁹ Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. ¹⁰ Dios gunná bë'ë xibá na' para gun ga gata' queé'ru' yöl-la' na'bán, pero ben ga gúquibe'eda' chinati caza'. ¹¹ Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. ¹³ ¿Naru' bentsö lë na' naca dxi'a ga bidxín quia' yöl-la' guti? ¡Biti' ca' naca ca'! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-

la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

¹⁴ Nóziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. ¹⁵ Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. ¹⁶ Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'. ¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. ¹⁸ Nözda' biti' zóalen neda' le naca dxi'a, o huáca innía', lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' lë na' naca dxi'a. ¹⁹ Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. ²⁰ Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

²¹ Caní naca le raca queëru' yúgu'tëru'. Cate' ré'ëniru' gunru' le naca dxi'a, dzaga rë'u le run ga runru' le ruá' dö'. ²² Lu icja ládxi'da'ahua' raza ládxa'a xibá queë' Dios ²³ pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

²⁴ ¡Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'? ²⁵ ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

Le runru' tu' zóalenë' Dios Bö' Lá'ayi rë'u

8 ¹ Que lë ni na', bíti'rö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bíti'rö tunë' ca ré'ëni yöl-la' bönáchisö quégaquië', pero ca ré'ënë' Dios Bö' Lá'ayi tunë'. ² Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti. ³ Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusól-lë'e Zxí'ini cazë', ate' guljë' bönachi ca nácaru' rë'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'. ⁴ Caní benë' para gaca gunru' idútë le naca tsahui' le rinná bë' xibá queë', nülöru' na' bíti'rö runru' ca ré'ëni yöl-la' bönáchisö queëru', pero ca ré'ënë' Dios Bö' Lá'ayi runru'.

⁵ Bönni' tunë' ca ré'ëni yöl-la' bönáchisö quégaquië', tuí'i ládxi'gaquië' le naca que yöl-la' bönáchisö quégaquië', pero bönni' tunë' ca ré'ënë' Dios Bö' Lá'ayi, tuí'i ládxi'gaquië' le naca queë' Dios Bö' Lá'ayi.

⁶ Channö ruí'i ládxi'siru' le naca que yöl-la' bönáchisö queéru', tsaz gátiru', pero channö ruí'i ládxi'ru' le naca queé' Dios Bö' Lá'ayi, chidé yöl-la' na'bán idú queéru', en ribózaru' dxi ladxi'. ⁷ Núti'tës nu ruí'i ládxi'sö le naca que yöl-la' bönáchisö que, biti' rilé'e Dios dxi'a, tu' cabí run nu na' ca rinná bë' xibá queé' Dios, en biti' ca' gaca gun caní. ⁸ Que læ ni na', bönni' na' tunë' ca ré'ëni yöl-la' bönáchisö quégaquië' biti' gaca ilunë' le raza ládxi'ë Dios.

⁹ Na'a, bíti'rö runli' ca ré'ëni yöl-la' bönáchisö queéli', pero runli' ca ré'ënë' Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi læ', Nu na' risól-lë'ë Cristo queéru', biti' néquinë' queé' Cristo. ¹⁰ Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. ¹¹ Bö' Lá'ayi queé' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

¹² Que læ ni na', libí'ili' böcha'a, dë tu le ral-la'ru', pero calëga que yöl-la' bönáchisö queéru', para cabirö gunru' ca ré'ëni yöl-la' bönáchisö queéru' na'. ¹³ Channö runli' ca ré'ëni yöl-la' bönáchisö queéli', gátili' tsaz, pero channö len yöl-la' huáca queé' Dios Bö' Lá'ayi runli' ga ila'niti le runli' lu yöl-la' bönáchisö queéli', gata' yöl-la' na'bán idú queéli'.

¹⁴ Yúgu'të nupa tun ca ré'ënë' Dios Bö' Lá'ayi nácagaca zxí'inë' Dios. ¹⁵ Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzóbili', pero chinunë' ga nácali' zxí'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad. ¹⁶ Lë cazë' Dios Bö' Lá'ayi ruzéajni'inë' bö' naca cázaru', en runë' ga nóziru' nácaru' zxí'inë' Dios. ¹⁷ Channö chinácaru' zxí'inë' Dios, gata' ca' queéru' tsözxón len Cristo le nequi queé' Xúziru' Dios. Caní gaca queéru' channö riguí'i rizáca'lenru'-në' tsözxón Cristo para uzí'iru' xibé tsözxón len Cristo yöl-la' zxön queé' Dios.

¹⁸ Runi neda', yugu' læ ni riguí'i rizáca'ru' na'a naca tu le cuídi'do'os tsca naca yöl-la' zxön na' gata' queéru' dza si' za'. ¹⁹ Ta'böza yúgu'të le nunë' Dios, en ta'zé ládxi'gaca idxintë dza na' ulu'ë lahui Dios yugu' bönni' nácagaquië' zxí'ini cazë'. ²⁰ Yúgu'të læ na' nunë' Dios gula'dödi lu na' le run ga ila'niti, calëga tu' gulé'ëni caz gaca caní, pero tu' benë' Dios ga naca caní. Benë' ca' ga naca löza que idútë læ na' nunë', ²¹ ate' ulu'lágaca yúgu'të le nunë' Dios lu læ na' run ga ila'niti. Caní gaca, yúgu'të læ na' ulu'zí' ca' xibé yöl-la' rusölá le nazáca'da' na' ulu'zi'ë xibé yugu' zxí'inë' Dios. ²² Nóziru' ta'guí'i ta'zaca' yúgu'të le nunë' Dios ga ridxintë na'a dza, ca na' riguí'i rizáca'nu tu nígula chizóa sóabi' bí'ido' queénu. ²³ Riguí'i rizáca'a, calégasö yödzölió ni, pero riguí'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queéru' le ruluí'i rë'u ca ral-la' gaca cázaru'. Riguí'i rizáca'ru' tsanni ni ribózaru'

dza ni' ulu'ë lahui Dios nácaru' idú zxí'inè', dza ni' únè' ca' idútè le naca cázaru'. ²⁴ Tu' runru' löza lè ni, nuláru' rë'u, pero channö gaca ilé'eru' lè na' runru' löza, biti' naca tu le ribózaru'. Biti' ribózaru' le chirilé'eru'.

²⁵ Na'a, channö runru' löza tu le cabí gaca ilé'eru', lu yöl-la' riböza zxön ladxi' ribózaru' le.

²⁶ Lësca' caní rácalenè' Dios Bö' Lá'ayi rë'u cate' rudú ládxi'ru', tu' cabí nóziru' bi ral-la' inábiru'-nè' Dios, pero Lë cazè' Dios Bö' Lá'ayi rudödè' xtídza'ru' lahuè' Dios, ate' lu yöl-la' rinaba yudxi queè' rinnèda' ládxi'ë, tsca cabí gaca nu inná. ²⁷ Dios ruyúè' le yu'u icja ládxi'do'gaca bönachi, en nózinè' le ré'ënè' innè' Dios Bö' Lá'ayi na', ate' Lè', ca ré'ëni quézinè' Dios, rudödè' xtídza'gaca nupa néquiquequi quez queè' Cristo lahuè' Dios.

Nadéli'tëröru' tu' zóalenè' Cristo rë'u

²⁸ Nóziru' tu'zi'ë xibé bönni' yúgu'tè le raca quégaquiè', bönni' na' nadxí'iguequinè' Dios, ate' bulidzè' Dios légaquiè' ca nuzóa cazè' gunè'.

²⁹ Yugu' bönni' na' guró cazè' queè' Dios zí'atëlö, buzóè' ca' quégaquiè' zí'atëlö ilácagaquiè' ca naca cazè' Zxí'inè', para gáquiè' Zxí'inè' lo ladañ zían bóchë'ë. ³⁰ Nupa na' buzóè' Dios quégaquiè' zí'atëlö ca ral-la' ilácagaquiè', bulidzè' ca' légaquiè', ate' yugu' bönni' na' bulidzè', benè' légaquiè' tsahui', ate' yugu' bönni' na' benè' légaquiè' tsahui', benè' ga tu'zi'ë ca' xibé yöl-la' zxön queè'.

³¹ ¿Bizxi caz innaru' na'a ca nácgaca lè ni? Channö rácalenè' Dios rë'u, biti' ral-la' gádxiru' sal-la' bi ilún bönachi queéru'. ³² Dios, idú ládxi'ë bennè' queéru' Zxí'ini cazè'. Budödè' lè' para gútiè' uláz queéru'. Channö caní benè' Dios, ¿naru' cabí gúnnadè'ë queéru' tsözxön len Zxí'inè' yúgu'tè le dè? ³³ ¿Nuzxi caz gaca bi usubaga' nupa na' guró cazè' queè' Dios? ¡Cuntu nu gaca, tu' run cazè' Dios ga nuhuóácaru' tsahui'! ³⁴ ¿Nuzxi caz gaca ichugu queéru' gátiru'? ¡Cuntu nu gaca, tu' guti cazè' Cristo uláz queéru', en le nácarö lo, bubanè' lu yöl-la' guti, ate' na'a zoè' cuita lè'ë ibèla Dios ga nácatèrè' zxön, ate' rnnè' dxi'a uláz queéru' lahuè' Dios! ³⁵ Sal-la' bi raca queéru', nöz quéziru' nadxí'inè' Cristo rë'u. Nóziru' nadxí'inè' rë'u:

sal-la' riguí'i rizáca'ru', o sal-la' risèbi ládxi'ru',
o sal-la' ta'bía ládxi'gaca bönachi rë'u,
o sal-la' ridunru', o sal-la' riyadzaj le gácuru',
o sal-la' zoa bönadxi queéru', o sal-la' ilútiè' bönni' rë'u.

³⁶ Ca nácgaca lè ni nazúaj lu guichi lá'ayi, rnna:
Tu' néquitu' quiu' Li', túntica'sö bönachi ga gátitu'.
Nácatu' ca yugu' bö'cu' zxila',
nadódigacaba' lu na' nu guti légacaba'.

³⁷ Na'a, tu' zóalen rë'u Nu na' nadxí'i rë'u, nácatèrö löza idéli'ru' lu le raca queéru'. ^{38,39} Que lè ni na' runi neda':

Biti' bi sequi' gun ga bíti'rö idxí'inë' Dios rè'u.
 Nadxí'inë' rè'u tu' néquiru' queë' Xanru' Jesucristo.
 Biti' sequi' gun caní yöl-la' guti o yöl-la' na'bán,
 o yugu' gubáz lá'ayi o nupa ta'nná bë',
 o yugu' yöl-la' huáca que tu' xihui',
 o bíti'tës bi zoa o bíti'tës bi si' za',
 o tu le dë xitsá'alö o tu le dë cadxí'ilö,
 o bíti'tës bi nunë' Dios.

Dios guró cazë' queë' bönachi Israel

9 ¹ Ruá'a didza' idútë li tu' néquida' queë' Cristo, ate' röjlóz didza' ni le naca queë' Dios Bö' Lá'ayi le yu'u icja ládxi'da'ahua'. iBiti' rizí' yë'a! ² Ruhuí'inide'eda', en risébitica'sö ládxa'a ³ tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquië', gué'ëni quézida' ubéaj ládxë'ë Dios neda', en ulá'alena' Cristo. ⁴ Yugu' bönni' uládz quia' na' nácagaquië' zxí'ini xi'sóë' Israel, ate' Dios bë'ë légaquië' lataj ilácagaquië' zxí'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gaquië' Lë', ate' budödë' lu ná'agaquië' yugu' le guzxí' lu në'ë gunë' le ilún tsahui' bönachi. ⁵ Nácagaquië' zxí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. iRácatica'sö queë' yöl-la' ba! iCa' gaca!

⁶ Sal-la' yúgu'të bönni' uládz quia' biti' nazí' lu ná'agaquië' Cristo, biti' ral-la' innaru': Nítisö böáca xtídzë'ë Dios. Calëga yúgu'të zxí'ini xi'sóë' Israel nácagaquië' idú bönachi Israel, nupa néquiquequi queë' Dios. ⁷ Sal-la' gúljagaquië' zían zxí'ini xi'sóë' Abraham, biti' guláquië' yúgu'të' idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: “Yugu' zxí'ini xi'sóë' Isaac ilaca idú zxí'ini xi'sú.” ⁸ Caní naca, nupa nácagaca zxí'inë' tu bönni' néquinë' queë' Dios, calëga yúgu'të' nácagaquië' zxí'inë' Dios. Lësca' caní, nácagaca idú zxí'ini xi'sóë' Abraham núpasö na' náljagaca ni'a que lë na' guzxí' lu në'ë Dios. ⁹ Lë na' guzxí' lu në'ë Dios unödzejë' queë' Abraham rnna caní: “Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'.”

¹⁰ Calëgasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', ¹¹⁻¹³ cate' ni' si' iláljabi', en biti' bi núnigacabi' le naca dxi'a o le ruá' dö', Dios gudxë'-nu Rebeca na', gunné': “Bi'i bönni' zí'alö quiu' gunbi' xichinbi' bi'i buropi.” Didza' ni röjlóz lë na' nazúaj lu guichi ca gunné' Dios, le rnna: “Bidxí'ida'-në' Jacob, en calëga Esaú.” Caní guca, bugá'ana tsutsu le buzóë' tsaz Dios ca naca lë na' chiguró cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribó cazë' Dios nu rulidzë'.

¹⁴ ¿Bizxi caz innaru' na'a? ¿Naru' runtsè' Dios le cabí naca tsahui'?
 iBiti' ca' runè' caní! ¹⁵ Dios gudxè' Moisés, gunné': "Huéchi' ládxa'a nu
 ré'ènda' huéchi' ládxa'a, en güí'i ládxa'a nu ré'ènda' güí'i ládxa'a."

¹⁶ Que læ ni na', biti' raca caní ni'a que le té'èni caz bönachi, o tu' runè'
 bayudxi nu bönni', pero naca tu' ré'èni quézinè' Dios, ruhuéchi' ládxe'è
 bönachi. ¹⁷ Ca naca læ ni nazúaj lu guichi lá'ayi ca na' Dios gudxè'
 Faraón, gunné': "Que læ ni na' buzóa' li' ga rinná bë'u para ulu'a lahui
 yöl-la' huáca quia' ga zu', en guna' ga ilunbè' bönachi idútè yödzölió le
 naca' neda'." ¹⁸ Caní naca, Dios ruhuéchi' ládxe'è nu ré'èni quézinè', en
 læsca' caní runè' zidzaj icja ládxi'da'ahuè' nu bönni' ré'èné' gunè' zidzaj
 icja ládxi'da'ahuè' bönni' na', ca na' benè' queè' Faraón na'.

¹⁹ Na'a guiéli' neda': "Channö caní naca, ¿bizx que rusubáguè'è Dios
 bönachi xíguia'? ¿Nuzxi caz gaca tá'baga' le ré'èni quézinè' Dios gunè'?"

²⁰ iBiti' ca' naca caní! ¿Nuzxi caz li' rnnío' que Dios? ¿Naru' huácatsö tu
 yusu' néquini yu guíè bönni' huen rø'ö, inná: "¿Bizx que benu' neda'
 caní?" ²¹ ¿Naru' cabí dè lu në'è bönni' huen rø'ö gunè' que guna' na' tu
 yusu' nu ugún le dxin ga liná', en que la' guna' ná'asö gunè' ia'tú yusu'
 nu ugún le dxin ga biti' naca liná'?

²² Ré'èni quézinè' Dios ulu'è lahui ca gunè' xíguia' nu ruá' dø' en
 gunè' ga gaca bë' yöl-la' huáca queè', pero lu yöl-la' riböza zxön ladxi'
 queè' biá' gulénè' yugu' bönni' ni' ral-la' ichúguiè' quégaquiè', yugu'
 bönni' na' nabága'gaquiè' xíguia', en run bayudxi usunítiè' légaquiè'.

²³ Caní runè' Dios para gaca bë' nácatèrø lesaca' yöl-la' ruzá' ladxi'
 queè', læ na' rulu'è lahui lógaca nupa na' ruhuéchi' ládxe'è, bönni' na'
 buzóè' quégaquiè' zí'atëlø ulu'zi'è xibé yöl-la' zxön queè'. ²⁴ Yugu'
 bönni' caní bulidzè' Dios. Calégasö bulidzè' netu', bönachi judío, pero
 læsca' bulidzè' bönachi izá'a. ²⁵ Ca naca læ ni nazúaj lu guichi lá'ayi ca
 na' bë'è didza' Oseas uláz queè' Dios, gunné':

Nupa biti' nácgaca bönachi quia',
 gu'a láguequi: Bönachi quia',
 ate' nupa na' biti' bidxí'ida',
 gu'a láguequi: Nupa nadxí'ida'.

²⁶ La' ná'asö ga gunnía' quéguequi:
 "Biti' nácali' bönachi quia'",
 si' láguequi: "Yugu' zxí'inè' Dios ban."

²⁷ Na'a, ca naca quégaca zxí'ini xi'sóè' Israel, Isaías gunné':
 Sal-la' ila'yanè' zxí'ini xi'sóè' Israel,
 en iláquiè' tsca naca yuzxi tu ra' yegu zxön,
 ulu'lé' nabábasè'.

²⁸ Xanru' Dios la' guntè' ga gaca idútè
 læ na' ichúguiè' quégaca bönachi yödzölió ni.

²⁹ Lësca' caní Isaías bë'è didza' zí'atëlø, gunné':
 Dios, Xanru' unná bë' idú,

la'tu' cabí buká'anë' queëru' yugu' xzí'ini xi'sóaru',
 ugá'anaru' ca yödzö Sodoma, en yödzö Gomorra,
 yugu' yödzö na' busunítië' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' biti' nabábagaquië' Israel chibila'déli'në' nuhuöácagaquië' tsahui' lahuë' Dios, en biti' gulunë' bayudxi ulu'huöáquië' tsahui' lahuë' Dios, pero nuhuöácagaquië' tsahui' tu' ta'yéajlë'ë Dios. ³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquië' tsahui', biti' bila'déli'në' le ral-la' gata' quégaquië' tu' tunë' ca rinná bë' xibá na'. ³² ¿Bizx que na' guca caní? Caní guca, tu' cabí gulunë' caní lu yöl-la' réajlë' quégaquië' Dios, pero rácasö quégaquië' gulé'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchégu'gaquië' lu lë na' nazí'i le: Guió'j Ga Nu Röjchegu'. ³³ Ca naca lë ni nazúaj lu guichi lá'ayi, rnna:

¡Buli'yú! Uzóa'-në' yödzö Sión bönni' na'
 gáquië' ca tu guió'j ga nu tsöjchegu',
 guió'j na' gun ga nu ichixi inigui.
 Nu tséajlë' Lë', biti' ca' utuí'i nu na'.

10 ¹ Libí'ili', bócha'ado', le rizé ládxa'a, en le rinábida'-në' Dios gunë' quégaca bönachi Israel naca gunë' ga ulu'lé'. ² Runa' ba nalí quégaquië', idú ládxi'gaquië' tuí'i ládxi'gaquië' Dios, pero calëga len yöl-la' réajni'i idú. ³ Biti' nözguequinë' ca runë' Dios, runsë' ga nácaru' tsahui', pero té'ënnë' ilún cúngaquië' tsahui' rácasö quégaquië', en biti' ta'culë' nöxaj ládxi' lahuë' Dios para gaca gunë' légaquië' tsahui'. ⁴ Budxi benë' Cristo le ré'ëni gun xibá queë' Moisés, benë' ga gaca ulu'huöáca tsahui' yúgu'të nupa ila'yéajlë' Lë'.

⁵ Ca naca que nu huöáca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: “Bönni' na' gunë' idútë ca rinná bë' xibá na', soë' ibanë' tu' gunë' caní.” ⁶ Na'a, ca naca que nu huöáca tsahui' tu' réajlë' Dios, rnna caní: “Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?” Lë ni naca, para gun nu na' ga huötjë' Cristo, ⁷ en biti' innó': “¿Nuzxi caz huötaj ga dë lataj que nupa chinátigaca?” Lë ni naca, para gun nu na' ga cuenë' Cristo, urúajë' lu yöl-la' guti. ⁸ Na'a, ¿bizxi caz rnna? Caní rnna: “Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'.” Lë ni naca didza' que le réajlë'ëru' Dios runtu' libán que, rnnatu': ⁹ “Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'.” ¹⁰ Lu icja ládxi'do'oru' réajlë'ëru' Jesús para gácaru' tsahui', ate' len didza' ruí'iru', ruluí'iru' lahui le náquië' Jesucristo para uláru'.

¹¹ Nazúaj lu guichi lá'ayi le rnna: “Biti' ca' ulu'tuí'i yúgu'të nupa ta'yéajlë' Lë'.” ¹² Dios, la' tuz ca ruí'i ládxë'ë yugu' bönni' judío, enca' yugu' bönni' idútë yödzölió, tu' Lë cazë' Xanru' náquië' Xángaquië' yúgu'të', en nápadë'ë bi unödzjë' quégaca yúgu'të nupa tu'lidza Lë'.

¹³ Ca naca lë ni nazúaj lu guichi lá'ayi, rnna: “Ulu'lá yúgu'të nupa ulu'lidza Lë' Xanru'.” ¹⁴ ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntu nu zoa nu gun libán lógaquië'? ¹⁵ ¿Nacxi caz gaca ilunë' libán channö cuntu nu isöl-la' légaquië'? Ca naca lë ni nazúaj lu guichi, rnna: “Bica' bágaca nupa na' ila'dxinë' ga nacuá' bönni' rójéngaquië' libán que le ribequi dxi ládxi'ru', en tunë' libán que didza' dxi'a.”

¹⁶ Na'a, calëga yúgu'të' gula'zì' lu ná'agaquië' didza' dxi'a. Ca naca lë ni, Isaías gunné': “Xan, ¿nuzxi caz guyéajlë' le bentu' libán que?” ¹⁷ Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

¹⁸ Na'a rnní'a: ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzölió bila'yöni chí'iguequi.

Yúgu'të lataj bila'dxín xtídza'guequi.

¹⁹ Lësca' rnní'a: ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',

tu' idxí'ida' bönachi biti' nabábagaca libí'ili'.

Ni'a quégaca bönachi cabí ta'yéajni'i guna' ga leli'.

²⁰ Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunné':

Bila'dzöli neda' nupa biti' gula'guílaj neda'.

Buluí'i lahua' lógaquië' bönni' biti' bi gula'nábinë' neda'.

²¹ Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': “Idú dza bulí na'a, bulidza' bönachi biti' túngaca ca rnna xtídza'a, en ta'dá'baga' neda'.”

Nupa nulágaca ladaj bönachi Israel

11 ¹ Na'a rnní'a: ¿Naru' nusán në'ë Dios bönachi Israel? ¿Biti' ca' naca caní! Neda' caz naca' bönni' Israel. Naca' zxí'ini xi'sóë' Abraham, en nababa' di'a dza queë' Benjamín, zxí'ini cazë' Israel na'.

² Dios biti' nusán në'ë bönachi queë', nupa na' guró cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné': ³ “Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza'

neda' nagá'ana' quiu', ate' té'ënnë' ilútië' ca' neda'." ⁴ Na'a, ¿bizxi didza' bubi'ë Dios? Caní gunné': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu zxíbigaquië' lo budó' guió'j na' nazí'i le Baal." ⁵ Lësca' caní naca dza ni zóaru' na'a, nagá'anagaca bal-la bönachi Israel, nupa na' guró cazë' queë' Dios tu' ruzá' ládxë'ë caní quégaquië'.

⁶ Channö naca le ruzá' ládxë'ë caní quégaquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxë'ë queëru' Dios bítirö gaca tu le ruzá' ládxë'ë queëru'.

⁷ ¿Bizxi caz innaru' na'a? Lë na' gula'guíljë' bönni' Israel, biti' bila'déli'në', pero chibila'déli' le nupa ni' guró cazë' queë' Dios, ate' ia'zica'rë' na', Dios benë' zidi icja ládxi'do'gaquië'. ⁸ Ca naca lë ni nazúaj lu guichi lá'ayi, rna: "Dios benë' ga nácagaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, biti' ca' ta'yéajni'inë'. Caní naca quégaquië' ga ridxintë dza ni zóaru' na'a. ⁹ Ca naca lë ni bë'ë ca' David didza', gunné':

Yugu' laní quégaquië' ulu'huöáca le ila'zón légaquië',
 en ca tu yalaj ga ila'rölinë'.
 Ilaca ca' le ilún ga ila'chíxinë',
 en ca tu le uzí' lëbi légaquië'.

¹⁰ Ila'chul-la guió'j lógaquië', para cabí ila'lé'enë'.
 Ila'yechu tsaz cúdzu'gaquië' tu' ilu'ë yua'.

Ca gaca ulu'lagaca bönachi biti' nácagaca judío

¹¹ Na'a rnnía': ¿Naru' gula'chíxinë' yugu' bönni' judío ga bidxintë gula'nítië' tsaz? ¡Biti' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lagaca nupa biti' nácagaca judío para gunë' ga ulu'zxé'enë' yugu' bönni' judío léguequi. ¹² Le gulunë' bönni' judío, gula'chíxinë', ben ga bidxín quégaca bönachi yödzölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa biti' nácagaca judío tu' gula'nítië' yugu' bönni' judío, zxóntërö gaca le gata' quéguequi cate' yugu' bönni' judío na' ulu'huöáquië' queë' Dios.

¹³ Na'a rea' libí'ili' biti' nácali' judío, rnnía': Tu' naca' gubáz nasöl-lë'ë Dios lógaca nupa biti' nácagaca judío, runa' zxön lë na' dë lu na'a

¹⁴ para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lé' bal-lë'. ¹⁵ Channö bulu'huöáca bönachi nacua' idú yödzölió queë' Dios tu' bulu'nítië' yugu' bönni' judío xilátjagaquië', zxóntërö gaca le gata' quéguequi cate' ulu'huöázië' xilátjagaca cazë' na'. Gaca ca raca cate' tu'bángaca nupa chinátigaca. ¹⁶ Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

¹⁷ Nácagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yójtá'ali' yaga

olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'. ¹⁸ Que læ ni na', biti' gun ba zxön cuinli', biti' uzóali' tsölá'alö nupa nácagaca ca ni'a në'e na' narúgugaca. Channö run ba zxön cuinli', ral-la' inózili' calëga libí'ili' rugáguli' luí yaga na', pero luí yaga na' rugagu libí'ili'.

¹⁹ Nadxi ca' innó': "Gula'rugu ni'a në'e yaga na' para gaca tsázia' neda' xilátjagaca." ²⁰ Nácatë didza' ru'u, pero gula'rúguië' tu' cabí gula'yéajlë'ë, ate' yöjtó'o li' yaga na' tu' réajlë'u Dios. Que læ ni na', biti' ral-la' gun ba zxön cuinu', pero ral-la' gádxinu' Dios. ²¹ Channö benë' Dios léguequi xíguia', nupa na' nácagaca caz ni'a në'e yaga dxi'a na', ñnaru' cabí gunë' xíguia' ca' li'? ²² Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácatë rúndë'ë xíguia' nupa na' gula'chixi, pero náquië' dxi'i ladxi' len li'. Que læ ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. ²³ Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö. ²⁴ Nacu' li' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntú nu udá' tu ni'a në'e yaga guí'a. Yénni'tërö huáca quégaquië', nácagaca cazë' ni'a në'e yaga dxi'a na', huáca tsöjtá'gaquië' leyúbölö lu yaga quéguequi cazë' na'.

Ca gaca ulu'lágaca bönachi Israel

²⁵ Bócha'ado', ré'ënda' inózili' læ ni bigachi', para cabí gun ba zxön cuinli' ca naca yöl-la' réajni'i queéli'. Bulu'huóaca bal-la bönachi Israel zidi ladxi', ate' caní iláquië' ga idxinrö dza chinayá zgaca yúgu'të bönachi biti' nácagaca judío ga rinná bë'ë Dios, nupa na' ral-la' ulu'lágaca. ²⁶ Tödi na' gata' lataj ulu'lé' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusölá,
en ugúa le ruá' dö' nabága'gaca zxí'ini xi'sóë' Jacob.

²⁷ Læ ni naca didza' dzaga gúnlena' légaquië'
cate' ugúa' dul-la' nabága'gaquië'.

²⁸ Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca' légaquië', tu' guró cazë' queë' xuz xtó'ogaquië'. ²⁹ Tsaz runödzjë' Dios le runödzjë', en tsaz rulidzë' bönachi. ³⁰ Ca na' naca queéli', zí'atëlö biti' benli' ca rnna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'. ³¹ Lësca' caní naca quégaquië' na'a, biti' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a. ³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxóntërö naca yöl-la' tsahui' queë' Dios, læ na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en biti' gaca nu inözi yugu' le runë' Dios. ³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? ³⁵ ¿Nuzxi caz bi bunödzej queë' Dios para gun bayudxi bi ubi'ë Dios que? ³⁶ Yúgu'të le dë narúajgaca lu në'ë Dios, en taca lu në'ë, en nácagaca para uzi'ë xibéguequi. iGácatica'sö queë' Dios yöl-la' ba! iCa' gaca!

Ral-la' udödi cuinru' quez queë' Dios

12 ¹ iBöchi' luzá'ado'! iRuhuéchi' ládxë'ë Dios rë'u! Que læ ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios. ² Bítirö gunli' la' lébisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inózili' le naca dxi'a ré'ënë' Dios gunli', læ na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi ícjali', tsca naca yöl-la' réajlë' queéli' Dios le bennë' que queéli'.

⁴ Ca na' naca tuz idútë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', ⁵ lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que læ ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzjë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzjë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzjë' queë' usédinë' bönachi, dxí'ado' ral-la' usédinë' bönachi.

⁸ Bönni' na' Dios bunödzjë' queë' uzéajni'inë' bönachi, dxí'ado' ral-la' uzéajni'inë' légaquië'.

Bönni' bi unödzjë' que nu yúbölö, idú ládxë'ë ral-la' unödzjë'.

Bönni' rinná bé'enë' bönachi, idú ládxë'ë ral-la' gunë' caní.

Bönni' rácalenë' luzé'ë,

len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxí'ili' luzá'ali' idú ládxi'li'.

Buli'cá'ana le ruá' dö'.

Guli'güí' ládxi'li' gunli' le naca dxi'a.

¹⁰ Guli'dxí'i-guéquinë' luzá'ali'

ca nadxí'iguecli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

¹¹ Buli'típatica'sö ládxi'li', en biti' gácali' xöhuëdi.

Guli'gún xichinë' Xanru' idú ládxi'li'.

¹² Buli'dzeja tu' zoa le runli' löza.

Guli'cóz zxön ladxi' cate' bi riguí'i rizáca'li'.

Buli'lídzatica'së' Dios.

¹³ Buli'nödzaj quégaca bönachi queë' Cristo

tsca nayádzjaguequinë'.

Guli'güí' lataj ga ila'cuá' nupa ta'dxín queéli'.

¹⁴ Guli'nábinë' Dios gunë' dxi'a

quégaca nupa ta'bía ládxi'gaca libí'ili'.

Guli'naba gaca dxi'a quégaquië',

en biti' udxíali' légaquië' dö'.

¹⁵ Buli'dzéjalen nupa tu'dzeja.

Guli'códxilen nupa ta'bödxí.

¹⁶ Guli'gaca tuz len luzá'ali'.

Biti' gun ba zxön cuinli',

pero guli'gún tsözxön yugu' bönni' nöxaj ladxi'.

Biti' guéquili' chinadéli'li' idútë yöl-la' réajni'i.

¹⁷ Cuntu nu ubí'ili' que,

biti' guá'ali' dö' que nu ruá' dö' queéli'.

Guli'gún dxi'a quégaca yúgu'të bönachi.

¹⁸ Channö huáca, tsca séqui'li', guli'cóz dxi'a

len yúgu'të bönachi.

¹⁹ Böchi' luzá'ado', biti' uzí' lébili' bönachi la' libí'isili', pero guli'güí' lataj ubi'ë Dios quégaca bönachi na', tu' nazúaj lu guichi lá'ayi le rnna: Neda' caza' uzí' lëba'.

Neda' ubi'a quégaca bönachi.

Caní gunné' Xanru' Dios. ²⁰ Lësca' caní rnna:

Channö zoë' nu bönni' biti' ridzáguië' li' dxi'a,

en ridunë', bë'ë le gahuë'.

Channö ribidxë' nisa, bë'ë le guí'jë'.

Cate' gunu' caní, gunu' ga utuí'inë' bönni' na'.

²¹ Biti' gu'u lataj inná be'e le ruá' dö' li',

pero gunná be'e le ruá' dö' na',
ugunu' dxin le naca dxi'a.

13 ¹ Yúgu'tëli' ral-la' gunli' ca ta'nné' bönni' yúlahui'. Dios caz budödë' lu ná'agaquië' yöl-la' unná bë' nápagaquië', en nucu'ë xilátjagaquië' bönni' ni dë lu ná'agaquië' yöl-la' unná bë'. ² Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xigua'. ³ Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö ré'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'. ⁴ Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xigua' nu ruá' dö'. ⁵ Que lë ni na' run bayudxi gunli' ca rnnë' bönni' na' dë lu në'ë, calégasö tu' budödë' Dios lu në'ë gunë' libí'ili' xigua', pero lësca' para soa dxi ládxi'do'oli' lahuë' Dios. ⁶ Que lë ni na' ca' riguízxaj lázali' que yúlahui', tu' nácagaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

⁷ Guli'guízxaj yúgu'të bönachi le rál-la'li' quégaquië'. Guli'guízxaj lázali' lu na' nu ral-la' quízxaj lázali'. Guli'guízxaj dumí nu ral-la' quízxajali'. Guli'gadxi nu ral-la' gádxili', en guli'gún bal nu ral-la' gunli' bal. ⁸ Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bë' xibá queë' Dios nu nadxí'i luzé'e. ⁹ Caní ta'nná bë' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácate.

Biti' së ládxi'u le dë que luzó'o.

Yugu' xibá ni, en yúgu'të xibá ia'zica'rö, údxi gun nu run ca rnna didza' rnna caní:

Bidxí'i luzó'o ca nadxí'i cuinu'.

¹⁰ Nu na' nadxí'i luzé'e biti' bi run que luzé'e le ruá' dö'. Caní naca, nu na' nadxí'i luzé'e run idú ca rinná bë' xibá queë' Dios.

¹¹ Guli'gún caní tu' nózili' ca raza dza ni zóaru' na'a, en nózili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo.

¹² Ga zóaru' na'a naca ca chi'i dzó'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la' que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'. ¹³ Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tíl-lalenru' luzá'aru', en cabí uzxé'aru' luzá'aru'.

¹⁴ Na'a, ral-la' un cuinli' lu icja ládxi'do'oli' ca náquië' Xanru' Jesucristo, en biti' guí'li ládxi'li' gunli' le rizé ládxi'li' lu yöl-la' bönáchisö queé'li'.

Biti' ral-la' si' quídza'ru' böchi' luzá'aru'

14 ¹ Guli'güi' lataj nu réajlë' Cristo gun libí'ili' tsözxón sal-la' biti' naca idú ca réajlë' nu na' Lë'. Biti' tíl-lalenli' nu na' ca nácagaca le runi nu na' huáca nu gun. ² Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. ³ Na'a, bönni' na' rahuë' yúgu'të biti' ral-la' uzóë' tsölá'alö nu bönni' biti' rahuë' yúgu'të, en lësca' caní, bönni' na' biti' rahuë' yúgu'të biti' ral-la' si' quídzë'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo. ⁴ ¿Nuzxi caz li', rizí' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o biti' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

⁵ Nadxi ca' zoë' nu bönni' runrë' bal tu dza ca runë' bal ia'zíca'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. ⁶ Bönni' na' runë' bal tu dza, runë' le bal para tseaj ládxë'ë Xanru', ate' bönni' na' biti' runë' bal dza na', para tseaj ládxë'ë Xanru' biti' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' biti' rahuë' yúgu'të, biti' rahuë' le para tseaj ládxë'ë Xanru', en rë'ë ca' Dios: "Xclenu'."

⁷ Biti' zoë' nabanë' queéze' nitúë' bönni' nabábalenë' rë'u, en biti' ratië' queéze' nitúë' bönni'. ⁸ Channö zóaru' nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. ⁹ Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

¹⁰ Na'a li', ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. ¹¹ Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz,

ulu'zechu zxíbigaca yúgu'të bönachi lahua' neda'.

Ila'guixjö' yálajdo' naca' Dios."

¹² Caní naca, uchi'a usöröë' Dios yúgu'tëru'.

Biti' ral-la' gunru' ga ichixi iníguinë' böchi' luzá'aru'

¹³ Que lë ni na', bíti'rö ral-la' ichugu bé'aru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí

gunru' ga gunë' dul-la'. ¹⁴ Nöz quézida' biti' bi dë le ráguru' le gaca gun ga bítirö nácaru' tsahui' lahuë' Dios, ate' röjlöz lë ni didza' bë'e Xanru' Jesús. Channö réquinë' tu bönni' zoa bi gaca gun ga bítirö náquië' tsahui' lahuë' Dios, queë' bönni' ni, caní naca. ¹⁵ Channö rusuhuí'innu' böchi' luzó'o, tu' ragu' le runi lë' biti' ral-la' gáguru', biti' runu' ca ral-la' gun nu nadxí'i böchi' luzé'e. Biti' bi ral-la' gagu' le gun ga gaca chopá ládxë'ë bönni' na', gútië' Cristo uláz queë'. ¹⁶ Que lë ni na', biti' bi gunli' le gun ga ila'nné xihui' bönachi que le rusáca'li' queéli' naca tsahui'. ¹⁷ Cate' rinná bé'enë' Dios rë'u, biti' ruí'i ládxi'ru' le guí'aj gáguru', pero ruí'i ládxi'ru' gácaru' tsahui', en sóaru' dxi ladxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u. ¹⁸ Núti'tës nu run xichinë' Cristo ca nácgaca lë ni, run le raza ládxë'ë Dios, ate' urúaj dxi'a lógaca bönachi.

¹⁹ Que lë ni na' ral-la' gunru' le ilún ga gata' le ribequi dxi ládxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. ²⁰ Biti' bi ral-la' gagu' le gun ga gaca chopá ladxi' nu na' nuzóë' Dios. Nácatë lë na' ta'nná bönachi: “Yúgu'të dë lataj gáguru'”, pero gunru' le ruá' dö' channö gunru' ga ichixi iníguinë' luzá'aru' tu' nözi lë na' ráguru'. ²¹ Gácarö dxi'a cabí gagu' bëla', en cabí guí'ju' xisi uva nal-la, en biti' bi gunu' le gun ga ichixi iníguinë' böchi' luzó'o, o le gun ga gaca chopá ládxë'ë, o le gun ga huóaj ládxë'ë ca réajlë'ë Cristo. ²² Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' biti' ruxösa ládxi'da'ahuë' lë' tu' nözi lë na' runi lë' dë lataj gunë', ²³ pero bönni' na' raca chopá ládxë'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

Ral-la' gunru' le raza ládxë'ë böchi' luzá'aru'

15 ¹ Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Biti' ral-la' gunru' le raza ládxi'ru' la' cuínsiru'. ² Yúgu'tëru' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajlë'ë Cristo. ³ Caní ral-la' gunru', tu' cabí benë' Cristo le guyaza ládxë'ë la' cuinsë', pero guca queë' ca na' nazúaj lu guichi lá'ayi, le rnna: “Budubága'gaca neda' yugu' didza' xihui' guluí'i nupa gula'nné xihui' quiu' Li', Dios.” ⁴ Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribózaru' zxön ladxi', en ruhué tsahui' rë'u. Que lë ni na' zoa le runru' löza. ⁵ Rinábida'-në' Dios, Nu run ga ribózaru' zxön ladxi', en Nu ruhué tsahui' rë'u, gunë' ga gunli' tuz ca rusáca'li' queéli', para gácali' ca na' ré'ënë' Jesucristo. ⁶ Caní ral-la' gunli' para gácali' tuz, cú'uli'-në' tsözxón yöl-la' ba Dios, Xuzë' Xanru' Jesucristo. ⁷ Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo

guzxí' lu në'ë ca' rë'u. ⁸ Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxí' lu në'ë Dios unödzejë' quégaquië' xuz xtó'otu'.

Yugu' bönachi izá'a ila'yöni didza' dxi'a

⁹ Bidë' ca' Cristo para benë' ga ila'gú'u Dios yöl-la' ba nupa biti' náacagaca judío tu' ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li'
lógaca bönachi idútë yödzölió,
en gul-la' quiu' yöl-la' ba.

¹⁰ Ga yúbölö nazúaj lu guichi lá'ayi le rnna:

Libí'ili', bönachi idútë yödzölió,
buli'dzéjalen bönachi queë' Dios.

¹¹ Ga yúbölö nazúaj ca' lu guichi lá'ayi le rnna:

Guli'cu'ë Xanru' yöl-la' ba,
yúgu'tëli' biti' nácali' judío.
Guli'tséaj ladxi' Lë',
yúgu'tëli' zóali' idútë yödzölió.

¹² Lësca' caní buzúajë' Isaías lu guichi le rnna:

Ilá' lahui Nu nababa di'a dza queë' Isaí.
Gaca lo Nu na' para inná be'e nupa biti' náacagaca judío.
Nupa ni ilún löza Lë'.

¹³ Rinábida'-në' Dios, Nu run ga runru' löza, gunë' ga udzëjade'eli', en ga soa dxi ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

¹⁴ Böchi' luzá'ado'. Chinóz quézida' rúntica'sili' le naca dxi'a, en dëda' yöl-la' réajni'i queëli' para gaca uzéajni'ili' luzá'ali'. ¹⁵ Na'a naca' rugu ladxi', ruzúaja' queëli' lu guichi ni, bócha'a, en rusá'a ládxi'li' tu' zoa le buzá' ládxë'ë Dios quia' neda'. ¹⁶ Que lë ni na' runa' xichinë' Jesucristo lógaca bönachi biti' náacagaca judío, en runa' libán que didza' dxi'a queë' Dios, para gaca ugu'a bönachi biti' náacagaca judío lu në'ë Dios, nupa na' guró cazë' Dios Bö' Lá'ayi queë' Lë'. Ilácagaquië' ca tu le rigú'uru' lu në'ë Dios, le raza ládxë'ë Lë'.

¹⁷ Na'a, tu' rúnlena' tsözxón Jesucristo dxin, dë lu na'a tsaza ládxa'a ca naca le nuna' lu xichinë' Dios. ¹⁸ Lësca' rurúguida' innía' ca naca lë na' benë' Cristo lu na'a neda', benë' ga tun bönachi biti' náacagaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. ¹⁹ Lu na'a neda' bugunë' dxin ca' le náacagaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'ilö ga ridxintë luyú Ilírico,

chinuna' libán que didza' dxi'a ca naca queë' Cristo. ²⁰ Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélë'ë lahui dxin zxön chinunë' bönni' yúbölö. ²¹ Ca bena' neda' naca ca na' nazúaj lu guichi lá'ayi le rnna:

Ila'lé'e nupa nacuá' ga cuntu nu ben libán queë' Lë',
en ila'yéajni'i nupa catu caz bila'yöni ca naca queë'.

Ré'ënë' Pablo tsejë' yödzö Roma

²² Que lë ni na', sal-la' zían luzuí gú'unida' guída' ga zóali', biti' guca guída'. ²³ Na'a, chibudxi bena' dxin quia' yugu' lataj ni, en chiré'ënda' zían iz guída' ga zóali'. ²⁴ Que lë ni na', cate' tseja' luyú España, töda' ga zóali' libí'ili', tu' runa' löza uduyúa' libí'ili', en udzéjalenda' libí'ili'. Tödi ni' huáca ugú'uli' neda' nöza. ²⁵ Na'a ral-la' tseja' Jerusalén, tsöju'a tu le gácalen nupa ni' néquiquequi queë' Cristo. ²⁶ Caní guna', le gula'yaza ládxi'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzjë' quéguequi bönachi yechi' dzágagaca bönachi queë' Cristo, nacu'ë Jerusalén. ²⁷ Gula'yaza ládxi'gaquië' bönni' biti' nácagaquië' judío gulunë' lë ni. Le nácate naca tu le rál-la'gaquië' quégaca bönachi judío ni'. Channö bönni' biti' nácagaquië' judío tu'zi'ë xibé le nácagaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'. ²⁸ Que lë ni na', cate' údxi udöda' lu ná'agaca bönachi judío lë na' bulu'nödzjë' bönni' ni, ní'irö töda' ga zóali' libí'ili' cate' tseja' luyú España. ²⁹ Cate' guída' ga zóali', runa' löza idxínlena' yúgu'të le ruzí'iru' xibé ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'i ruchízië' Dios Bö' Lá'ayi icja ládxi'do'oru', ráta'yua' loli', bócha'ado', ulídzali'-në' Dios tsözxön len neda', inábili'-në' gácalenë' neda'. ³¹ Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsöju'a lu ná'agaquië' bönni' nácagaquië' queë' Cristo, nacu'ë Jerusalén.

³² Guli'nabi-në' ca', channö naca ca ré'ënë' Dios, gunnë' neda' lataj idxina' queéli' len yöl-la' rudzeja quia', para uzí' ládxi'lëna' libí'ili'.

³³ Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

Tu'gapa Dios luzé'eguequi bönachi queë' Cristo

16 ¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacuá' yödzö Cencrea. ² Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu,

unódzjali' queénu bíti'tës bi riquínnu. Lë cázanu gúcalennu bönachi zían, en gúcalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsözxón dxin queë' Jesucristo. ⁴ Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero lësca' yúgu'të böchi' luzá'aru' nabábagaquië' gapa nacuá' bönachi queë' Cristo biti' nácagaca judío, t'ë légaquië': "Xclenli'." ⁵ Guli'gapa Dios bönachi queë' Cristo tu'dübë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. ⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'. ⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxón lidxi guíë, en nadéli'gaquië' lataj lo ladaj bönni' gubáz nasól-lë'ë Cristo. Lësca' gula'yéajlë'ë Cristo zí'alö ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'. ⁹ Guli'gapa Dios Urbano, bönni' na' bënlenë' netu' tsözxón dxin queë' Jesucristo. Guli'gapa Dios Estaquis, bönni' na' nadxí'ida'.

¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo. ¹¹ Guli'gapa Dios Herodiön, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'. ¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu. ¹³ Guli'gapa Dios Rufo, bönni' rö queë' Xanru'. Guli'gapa Dios xiné'ë Rufo na', nácanu ca' ca xiná' caza'. ¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'.

¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpás, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

¹⁷ Na'a, ráta'yua' loli', bócha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacuá' bönachi caní ¹⁸ tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'lenë' yugu' bönni' nöxaj ladxi', tu'gunë' dxin didza' nöxaj ladxi', en didza' tséajlë'ëru' le cabí nácatë. ¹⁹ Rizé didza' ca na' runli' ca rnna xtídzë'ë Xanru', ate' ta'yöni yúgu'të bönachi. Que lë ni na' rudzējada' ni'a que le runli' libí'ili'. Na'a, ré'ënda' gácali' sina' gunli' le naca dxi'a, en calëga gunli' le ruá' dö'. ²⁰ Dios, Nu run ga zóaru' dxi ladxi', si' gunë' ga ucúl-

lali' Satanás, tu' xihui'. Rinábida'-në' Xanru' Jesucristo uzá' ládxë'ë queéli' le gácalen libí'ili'.

²¹ Bi'i Timoteo, bi'i na' rúnlenbi' neda' tsözxón dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzö ni, rugapë' Dios libí'ili'. Bóchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ládxë'ë queéli' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. ²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

²⁷ ¡Ni'a que le benë' Jesucristo, gácatíca'sö yöl-la' ba queë' la's dui Dios, Nu rácatërö caz! ¡Ca' gaca!